

АКАФИСТ СВЯТИТЕЛЮ И ЧУДОТВОРЦУ МИХАИЛУ, ПЕРВОМУ МИТРОПОЛИТУ КИЕВСКОМУ

Кондак 1

Избранный от Христа Бога сосуд, послан был еси в землю Русскую и язык наш святым крещением просветил еси святителю отче Михаиле, темже Владыце своему на небеси ныне предстоя, тому молися прилежно, от всяких бед и напастей избавитися стаду твоему, да зовем тебе: Радуйся, Михаиле, великий иерарше, Церкви Русския преславный первопрестольниче.

Икос 1

Архангелов и ангелов Царь, и всея твари Создатель и Промыслитель, милосердие Свое яви к людем страны нашея, во тме идолослужения ходившим, и ты, святителю Михаиле, яко апостола посла, да сия просветиши светом истиннаго богопознания. И се твоими ученьми, яже первее жертвы бесом приношаху, ныне души своя дароносят Христу. Тебе же благодарственная сия возносят песнопения: Радуйся, веры Христовы усердный насадителю. Радуйся, идолослужение искоренивый; радуйся, бесовския жертвы упразднивый. Радуйся, свете, от востока возсиявый; радуйся, тму идолобесия разгнавый. Радуйся, учением Христовым люди просветивый; радуйся, идольския требы крестом разрушивый. Радуйся, ниву Христову добре возделавый; радуйся, благодная семена на ней всеявый. Радуйся, медоточная уста Христова; радуйся, свирель благозвучная Духа Святаго. Радуйся, Михаиле, великий иерарше, Церкви Русския преславный первопрестольниче.

Кондак 2

Видал еси, святителю Михаиле, плоды трудов твоея проповеди граждане бо славнаго града Киева, истине твоего учения всею душею и сердцем внимлюще, увероваша во Христа истиннаго Бога, мерзских же идолов отвратишася и оных убо сокрушаху, иных же с поруганием в реку вметаху, в нихже беси: “О люте нам”, вопияху. Зря сия, блаженне отче, радовался еси духом твоим, благодарно поя Богу: Аллилуиа.

Икос 2

Разум богодухновенен имея, досточудне отче Михаиле, буия люди божественным твоим учением добре наказав, и гладом душевным таюция, евангельским слова хлебом напитав, Христови сия привел еси: Ему же, святителю, молися, о похваляющих тя сице: Радуйся, Церкви красото; радуйся, архиереев доброто. Радуйся, Православия светило; радуйся, благочестия правило. Радуйся, людей русских великий учителю; радуйся, пророчества во апостолах Перво-

званного славный совершителю. Радуйся, лика Богоизбранного отцев Печерских пред-стоятелю; радуйся, равноапостолам Кириллу и Мефодию равностоятелю. Радуйся, дванадесять сынов Владимира купелию Крещения отродивый; радуйся, тем всей земли его усердно послуживый. Радуйся, веру Христову распространивший; радуйся, прелесть демонскую низложивый. Радуйся, Михаиле, великий иерарше, Церкви Русския преславный первопрестольниче.

Кондак 3

Силою богоугодных молитв твоих, святе, праотцем нашим пособивый в Единого Истинного Бога уверовати, ложныя же боги отринуть и сокрушити душевныя кумиры наши: гордость убо смирением, сребролюбие же нестяжанием, блуд целомудрием, гнев кротостию, чревоугодие воздержанием, зависть доброжеланием, уныние же крепким на Бога упованием. Да тако избывше перунов духовных, возможем Богу предстати, Ему же ты, отче, научил еси нас веровати и пети непрестанно: Аллилуиа.

Икос 3

Имущи квас веры во Христа, жена, богومудрая княгиня Ольга, оный в сатех людей русских сокры. Тобою же, по воле Всемогущаго, все тесто державы Владимировы сквасив, возрасте в веру Христову. Сего ради приими от нашего усердия достойныя похвалы тебе: Радуйся, Божие к Руси благоволение; радуйся, молитв святыя Ольги исполнение. Радуйся, славнодержавнаго Владимира великий советодателю; радуйся, новоизбранных людей Христовых мудрый назидателю. Радуйся, имже царие наши и вси людие русские спасаются; радуйся, имже архиереи наши, священницы же и монаси хвалятся; радуйся, имже нищии от Бога богатеют и прославляются; радуйся, имже претружденные старцы чрез веру Христову в рай упокоеваются. Радуйся, имже младенцы преставшиися “Осанна” в вышних вопиют; радуйся, имже души сынов русских, яко искры, по стеблию к небеси текут. Радуйся, земли нашея прекрасное благословение; радуйся, преславнаго града Киева освящение. Радуйся, Михаиле, великий иерарше, Церкви Русския преславный первопрестольниче,

Кондак 4

Бурю идолов сокрушающую ощутивше, беси рыдающе вопияху: “О люте нашему окаянству. Яко прежде почитаемы от всех быхом, ныне же поругание от единого подъемлем пришельца, иже учит человеки во Христа убо веровати, нас же сокрушати, Единому Богу поюще: Аллилуиа”.

Икос 4

Слышим древле от Божественнаго Писания, яко падоша стены Иерихонския, Иисусом Навином, кивоту обносиму: ныне же вемы, яко идоли падоша тебе, святителю Михаиле во страну Русскую пришедшу. Темже мы, чада твоя, тобою в пресветлую Крещения одежду одеянии, благодарно восхваляем тя сице

зовуще: Радуйся, светильниче на горах Киевских светло возсиявый; радуйся, из тмы к свету люди приведый. Радуйся, терние многобожия весьма истребивый; радуйся, теплотою любви Божественныя души отец наших согреть. Радуйся, усты твоими Христа Сына Божия проповедавый; радуйся, огненным языком твоим идольское нечестие обличивый. Радуйся, в Троицаго Бога веровати отцы наши научивый; радуйся, доброплодная древета рая Иисусова насадивый. Радуйся, яко от тебе людие русскии водою благодати умышася; радуйся, яко тобою душевная очеса их во святей купели открышася. Радуйся; яко тобою, во славу Божию, церкви многия создашася; радуйся, яко тобою обители иноков соградишася. Радуйся, Михаиле, великий иерарше, Церкви Русския преславный первопрестольниче.

Кондак 5

Богосияннаго светильника тя, Михаиле богомудре, Великий Владимир во омраченную идолослужением Русскую землю приведе, да и zde твоим пришествием освятятся людие и истинныя веры познанием вразумятся, православно и богоугодно возносити хвалебную песнь Пресвятей Троице: Аллилуиа.

Икос 5

Слышав Патриарх Царьграда, яко Владимир Крещение святое восприя, и его яко святителей предначальника моляше: да мудраго учителя в Корсунь град пришлет и того митрополита земли Русской поставит, возрадовася зело и со освященным собором совет сотворив, избра тя, святе, сие великое послушание исполнити. Люди же русскии тя сретивше и благоговейный зрак лица твоего видевше, седы же твоя сладость слышавше, глаголаху: Радуйся, благий наш наставниче; радуйся, апостольския власти и чести преемниче. Радуйся, во архиереех славный; радуйся, в вере великий. Радуйся, в повелениях доблоразсудительный; радуйся, в поучениях пресладостный. Радуйся, кроткий нравом; радуйся, высокий по Бозе житием. Радуйся, правды усердный рачителю; радуйся, неправды грозный обличителю. Радуйся, яко твоими молитвами от вечныя смерти уповаем избежати; радуйся, яко твоими учениями жизнь вечную веруем стяжати. Радуйся, Михаиле, великий иерарше, Церкви Русския преславный первопрестольниче.

Кондак 6

Проповедник Христовы веры явился еси в Новеграде, Михаиле священне, в онь же пришед, идолы сокрушая, требища разоряя, люди крестил еси, церкви созидал еси и пресвитеры по градом и всеям поставлял еси, братолюбие и христианскому житию люди поучая и увещеая, да вси едиными усты и единым сердцем с тобою навькнут Христу Богу пети: Аллилуиа.

Икос 6

Возсиял еси, святителю Христов, яко звезда пресветлая во Отечествии нашем, и тьму идолюбесия светом Божественных твоих учений до конца подавил еси. Сего ради ты, яко ангела Божия, люди русский почитаху зовуще: Радуйся, веры нашае во Христа начало; радуйся, Церкви Божия в Руси основание. Радуйся, иерархом в проповедании слова Евангельскаго образе: радуйся, иноком, в путь богоугоднаго жития текущим, правило. Радуйся, праведной жизни миряном виновниче; радуйся, всем добродетельно живущим венечниче. Радуйся, чистотою душу твою украсивый; радуйся, путь жития временнаго во смирении духа препроводивый. Радуйся, дела благими светло просиявый; радуйся, премногими чудесы люди удививый. Радуйся, яко слово благо о пастве твоей Пастыреначальнику Христу воздал еси; радуйся, яко от руку Его праведное воздаяние приял еси. Радуйся, Михаиле, великий иерарше, Церкви Русския преславный первопрестольниче.

Кондак 7

Хотя преблагий Бог новыя люди Себе избрати, первее в познание Божественное великаго во царех Владимира приведе, иже умным сиянием благодати во святей купели освещся, прият ты пастыря вышним откровением, на Русь же овцам Своим, в неверии заблуждшим, приведе. Таже учением и Крещением во имя Отца, и Сына, и Святаго Духа в воде сия омыв во двор Христов привел еси. С ними же ныне престолу Его предстоя, молися да и нас сподобит с тобою на небеси приносить песнь Ему: Аллилуиа.

Икос 7

Новаго ты апостола зрим, архиерее блаженне Михаиле, землю Русскую обтекающа: яко достигнута тебе неко граду Ростову, идеже людей великое множество крестил еси и веровати в Троице Единому Богу научил еси, благочестию и благоразумию ты наказав и церкви многия воздвиг, пресвитеры же и диаконы им поставил еси, и уставы благочестны тем преподал еси, глаголющим тебе сицевая: Радуйся, благодатию Крещения главу Руси, аки диадимою увенчавый; радуйся, православием, аки перстнем, землю нашу Христу обручивый. Радуйся, сию в благочестие, аки в порфиру царскую облачивый; радуйся, Евангелие Христово, аки гривну златую на выю ея возложивый. Радуйся, Крест Господень в державу непобедимую ей даровавый; радуйся, вся чада ея православная Христу Господу и Пречистой Его Матери усыновивый. Радуйся, женише Церкви пресветлый; радуйся, сыне Небеснаго Отца преславный. Радуйся, отче отцев, велеlepая красото; радуйся, пастырю пастырей, всехвальная доброто. Радуйся, и всех родов русских молитвенниче; радуйся, небесных Ангелов собеседниче. Радуйся, Михаиле, великий иерарше, Церкви Русския преславный первопрестольниче.

Кондак 8

Странствующим и блуждающим в пустыни идолослужения сыном русским был еси путевождь в землю обетованную преподобне отче Михаиле, аще и не чотыредесять лет якоже Моисей, но чотыре лета точию люди Киевския страны детоводил еси, не манною тленною, но истинным хлебом с небесе сшедшим сия питая, иже есть Христос Господь. Сему убо поем о тебе песнь: Аллилуиа.

Икос 8

Весь в Бозе быв, архипастырю приснопамятне угождати тому присно паству твою поучал еси, чад твоих духовная и умоляя ничтоже любви Христовой предпочитати, мы же твоих чад духовных внуцы, тебе глаголем сице: Радуйся Христа Господа всею душою и сердцем возлюбивый; радуйся, веровати Ему и любити Его и нас научивый. Радуйся, яко Богу вельми угодил еси; радуйся, яко закон Божественный нам преподал еси. Радуйся, Небеснаго Владыки рабе благий и верный; радуйся, данный тебе талант не сокрывый, но трудолюбно умноживый. Радуйся, многу куплю им сотворивый, радуйся, похвалу велию от Господа твоего получивый. Радуйся, под иго благое Христово, со смирением выю свою подклонивый; радуйся, тяготу дне и вар, в винограде Его со усердием подъявый. Радуйся, динария вместо Небесное Царствие от Христа восприявый; радуйся, в райских обителях по трудех твоих сладце почивый. Радуйся, Михаиле, великий иерарше, Церкви Русския преславный первопрестольниче.

Кондак 9

Вси людие рускии, первее языческим многобожием блуждавшии, ныне же тобою, святителю Божий Михаиле, добре наставлении к Боговедению приидоша и во святей купели от слепоты разумных очес избавльшесе, Единого Создателя своего прославляют, Тому воспевающе: Аллилуиа.

Икос 9

Витийство человеческое не довлеет к прославлению трудов и подвигов твоих, духоносне отче, яже ты подъял еси: тако бо по вере ревновал еси, яко и к безбожным агаряном, к болгаром и сарацыном мужа некоего Марка философа на проповедь послал и люди ко Христу призывал. Ныне же глаголем тебе сице: Радуйся, подобно Илии по Господе Бозе поревновавый; радуйся, о распространении святыя веры Его много порадевый. Радуйся, во славу Христову потрудивыйся; радуйся, достопокланяемое имя Его пред языки пронесый. Радуйся, усердием во учении Христове апостолом уподобивыйся; радуйся, во спасении душ человеческих самому Христу подражавый. Радуйся, любве Божественныя исполненный; радуйся, состраданием к ближнему насыщенный. Радуйся, гrome капища языческая разрушай; радуйся, тимпане велегласный славу Божества Христова возвещай. Радуйся, яко дерзновение велие ныне ко Христу имаши; радуйся, яко престолу Ею в радости неизреченней предстоиши. Радуйся, Михаиле, великий иерарше, Церкви Русския преславный первопрестольниче.

Кондак 10

Спасения людем желая и Церкви добраго утверждения, пастырю наш пре-
благий, потщался сей изрядно вся устроити о русском племени новоизбранных:
пастыри и учителя по градом поставил еси и тем стадо словесных овец спору-
чив, Пастыреначальнику Христу сцарствоватьи сам отшел еси на великий плач и
рыдание паству твою и князя Владимира подвигнув, к мощем твоим припадаю-
щих, Богу же жалостне зовущих: Аллилуиа.

Икос 10

Царя Небеснаго Христа Бога верный раб и служитель был еси, отче наш
Михаиле, и аще о Господе сном смерти почил еси, обаче святое тело твое тле-
нию бысть непричастно, недугом же человеческим врачевательно явися. Темже
раце мощей твоих предстояще, молитвенно восхваляем тя: Радуйся, яко нетле-
нием тела твоего на земли светиши; радуйся, яко святостию души твоя на не-
беси блистаеши. Радуйся, страны русския пресветлое озарение; радуйся, велика-
го храма сего преизрядное украшение. Радуйся, града твоего Киева великий за-
ступниче; радуйся, обители Печерския усердный молитвенниче. Радуйся, о всех
чадах Церкви православныя теплый пред Богом ходатаю; радуйся, всем призы-
вающим тя на помощь скорый предстателю. Радуйся, яко богоугодным житием
твоим, аки солнцем пресветлым всех нас просвещаюши; радуйся, яко апостоль-
скими трудами твоими весь мир удивляеши. Радуйся, егоже тело пречестное яко
кипарис благовонный, в Церкви Божии благоухает; радуйся, его же душа пре-
святая яко кедр в раи Христове в радости процветает. Радуйся, Михаиле, вели-
кий иерарше, Церкви Русския преславный первопрестольниче.

Кондак 11

Пением хвалебным величаем тя, святителю Божий Михаиле, и ходатая у
Престола Небеснаго Владыки имени тебе чаем. Не посрами убо веры нашае,
пастырю предобрый, но приими молитвы наша, яко кадило благовонное, и умо-
ли Христа да дарует и нам добродетельне жизнь нашу скончати и с тобою у
Христа водворитися, да услышим глас твой к Нему о нас: се аз и дети, яже ми
дал еси, Господи, и к Нему с тобою вкупе воспоем: Аллилуиа.

Икос 11

Светозарная луча был еси, богомудре отче Михаиле, во тме многобожия
седающим, путеводящая к Солнцу Правды Христу Богу, Ему же молися, во свете
заповедей Его всегда нам пребывати, радостное пение тебе приносящим: Радуй-
ся, светильниче Трисияннаго Света; радуйся, заре Незаходимаго Солнца. Радуй-
ся, огню идольское нечестие попаляй; радуйся, пламеню, еретическая учения
пожигай. Радуйся, святителю, поучай всех, яко несть инаго Бога, кроме Не-
беснаго; радуйся, человекоевразумителю, глаголай, яко несть спасения вне со-
борныя апостольския Церкви. Радуйся, на богоугодное житие наставляй; ра-
дуйся, в Небесное Царствие путь показуй. Радуйся, звездо путеводящая ко

Христу; радуйся, путю, имже приидохом к истинному Богу. Радуйся, ключу врата райская сыновом русским отверзый. Радуйся, ходатаю, бсзчисленное множество сих тамо водворивый. Радуйся, Михаиле, великий иерарше, Церкви Русския преславный первопрестольниче.

Кондак 12

Благодать Божия по летех мнозех тело твое святое нетленно в земли соблюде, в церкви Десятинней положено, и яко сокровище многоценное пастве твоей цело и невредимо сие яви, яко ниже одежд твоих священных коснутися тлению: отсюду убо верою уразумехом, яко Христу предстоиши и молишися о почитающих тя и поющих Ему тебе ради: Аллилуиа.

Икос 12

Поюще святое и преславное житие твое, Михаиле равноапостольне, почитаем твою священную память, ревность же твою по Бозе восхваляем, любовь твою ко Христу и к ближнему превозносим. Ты же, о всеблаженнейший отче, не возгнушайся смиренным сим пением: Радуйся, яко Престолу Пресвятыя Троицы предстоиши; радуйся, яко Всемогущаго о всем мире молиши. Радуйся, яко со архангелы и ангелы Трисвятую песнь на Небеси поеши; радуйся, яко со апостолы в райских обителях пребываеши. Радуйся, яко с лики святителей пред Богом о душах наших душа ходатайствуеши; радуйся, яко с полки преподобных спасению нашему споспешествуеши. Радуйся, яко с Пречистою Девкою Богородицею, руке свои пречестныя о мире Отечества нашего ко Христу воздеваеши; радуйся, яко о соединении людей непрестанно Его умоляеши. Радуйся, со пророки и мученики Вышняго Царствия наследниче; радуйся, раю Божия со всеми святыми единовсельниче. Радуйся, небесных величий и красот зрителю; радуйся, безконечных сладостей и блаженств райских обладателю. Радуйся, Михаиле, великий иерарше, Церкви Русския преславный первопрестольниче.

Кондак 13

О всехвальный и предивный чудотворче, отче наш Михаиле, русския страны первый святителю и всех православных христиан предстателю, прими сие малое моление наше, в похвалу тебе приносимое, и молитвами твоими испроси нам у Бога в веце сем житие тихое и добродетелей исполненное, да и в жизни будущей сподобимся купно с тобою пети в Троице Единому Богу: Аллилуиа.

(Этот кондак читается трижды, затем икос 1 и кондак 1)